

# Nakorsaatit pissasaatitut atorneqartartut ilaasa inerteqqutaanerat pillugu Inatsisartut peqqussutaat

Kalaallit Nunaanni Peqqinnissamik Isumaginnittoqarfik pillugu inatsimmi nr. 369-imi, 6. juni 1991-imeersumi §§ 1 aamma 3 naapertorlugit aalajangersarneqarpoq:

**§ 1.** Nakorsaatit pissasaatitut atorneqartartut ilaat makku Inatsisartut peqqussutaanni pineqarput:

- 1) Anabole steroidit.
- 2) Testosteronit taakkunanngalu suliaasunit (derivater), aammalu atortussianik assigisaannik (androgen) sunniuteqartut.
- 3) Hormonit alliartortitsissutit.
- 4) Erytropoietinit atortussallu qassnik ukioqarnermut suaassutsimullu nalinginnaasumik pingaarutillit qaangerlugit aammi aap akui aappalaartut amerlassusiisa annertusineqarnissaannut sunniutaasartunut assingusut.
- 5) Atortussat makkunannga annertuumik pilersitsisut peersitsisulluunniit
  - a) hormonit alliartortitsisut.
  - b) testosteronit taakkunanngalu suliaasunit (derivater), aammalu atortussianik assigisaannik (androgen) sunniuteqartut imaluunniit.
  - c) erytropoietini aqoqanngitsoq.

**§ 2.** Nakorsaatit pissasaatitut atorneqartartut nakorsaatinut sorlernut allanut peqqussutip matuma atuunnissaanut Naalakkersuisut aalajangersagaliornissaminut piginnaatinneqarput.

**§ 3.** § 1-imi aamma § 2-mi nakorsaatit pissasaatitut atorneqartartut nakorsaatit pineqartut nakorsasiarieqassangillat, eqqunneqassangillat, anninneqassangillat, tuniniarneqassangillat, tunniunneqassangillat agguanneqassangillat pigineqaratilluunniit nappaammik pinaveersaartitsinermut katsorsaanermulluunniit atorneqarneri eqqaassangikkaanni imaluunniit ilisimatusarnermik siunertaqarneq eqqaassangikkaanni.

*Imm. 2.* Imm. 1-imi nappaammik pinaveersaartitsinermut katsorsaanermulluunniit atuineq inuinnaat eqqarsaatigalugit nakorsap nakorsatinik atueqqusineratut pissaaq.

*Imm. 3.* Aalajangersakkami imm. 1 eqqarsaatigalugu immikkut ittumik akuersissuteqarneq Naalakkersuisunit nalunaarutigineqarsinnaavoq. Immikkut ittumik akuersissuteqarnissamut atugassarititanik erseqqinnerusunik Naalakkersuisut aalajangersagaliorsinnaapput.

**§ 4.** § 3, 1-imik unioqqutitsisoq imaluunniit § 3, imm. 3-p aappaani atugassarititanik pineqartunik unioqqutitsisoq akiliisitaasussanngorlugu arsaarinniffigisassanngorlugu eqqartuunneqarsinnaavoq.  
*Imm. 2. Aktiaateqarluni ingerlatseqatigiiffik, piginneqataassuteqarluni ingerlatseqatigiiffik, piginneqatigiilluni ingerlatseqatigiiffik assigisaalluunniit unioqqutitsisimasoq akiliisitaasussanngorlugu arsaarinniffisassanngorlugulu eqqartuunneqarsinnaavoq.*

**§ 5.** Inatsisartut peqqussutaat atuutilissaaq ulloq 1. juli 2001.

*Namminersornerullutik Oqartussat, ulloq 31. maj 2001*

Jonathan Motzfeldt

/

Alfred Jakobsen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut